



PRIMEIRU
MINISTRU

**DISKURSU
PRIMEIRU-MINISTRU TIMOR-LESTE
TAUR MATAN RUAK**

Iha Debate Parlamentár kona-ba Pedidu
Renovasaun Estadu Emerjénsia da-14

Parlamentu Nasionál, Ioron 28 fulan-maiu tinan 2021

Exelénsia,

Senhor Prezidente Parlamentu Nasionál,

Exelénsia sira,

Vise-Prezidente, Sekretária no Vise-Sekretáriu Parlamentu Nasionál nian sira,

Exelénsia sira,

Senhora no Senhor Deputadu sira husi Bankada Polítika hotu-hotu,

Exelénsia sira, Karu Kolega sira,

Membru sira Governu Konstitusionál VIII,

Distintu Konvidadu sira,

Senhora no Senhor sira,

Povu Timor-Leste nian, iha rai laran no iha diáspora.

Iha tempu ne'ebé susar tebes no nakonu ho dezafiu maka Governu iha onra atu partisipa iha debate parlamentár kona-ba pedidu autorizasaun nian ne'ebé Sua Exelénsia Prezidente Repúblika apresenta ba Renovasaun ba Períodu Estadu Emerjénsia nian da-14 (dasanulu-resin-haat).

Haree ba evolusaun situasaun epidemiolójika ne'ebé hamosu preokupasaun maka'as iha nivel nasionál, membru Konseihu Superiór Defeza no Seguransa no membru Konseihu Estadu hateten katak sira konkorda ho renovasaun ba deklarasaun estadu emergjénsia nian, iha momentu ne'ebé número akumuladu husi infesaun ne'ebé provoca husi SARS-CoV-2 sa'e ba 6.000 (rihun nen), sura husi inísiu pandemia nian, no husi número ida-ne'e kazu kuaze 3.000 (rihun tolu) resin klasifikadu nafatin hanesan kazu pozitivu no ativu, iha sentru izolamentu nian oin-oin.

Governu propoin ona ba Senhor Xefe Estadu atu renova deklarasaun estadu emergjénsia, tanba haree ba faktu katak to'o data ida-ne'e rejista ona ema na'in 15 (sanulu-resin-lima) maka mate tanba moras ne'e no tanba matenek-na'in no espesialista saúde sira nian, nasionál no internasionál, ne'ebé Governu konsulta, konkorda ho hanoin katak situasaun epidemiolójika sei sai aat liután ba beibeik ho número husi kazu infesaun foun nian ne'ebé aumenta.

Maske total husi ema ne'ebé infetadu liu ona 1% husi populasau no maske rejista aumentu ida ne'ebé lais tebes husi propagasaun pandemia ne'e nian iha ita-nia país,

liuliu iha sidade kapitál, Dili, ne'ebé semana hirak ikus ne'e nakfilak ba episentru husi kazu foun sira, ema balu defende katak medida sira ne'ebé Estadu adota atu kontrola pandemia bele hamamar, hodi sujere atu ita filafali kedas ona ba situasaun normalidade nian, ne'ebé justifika ho razaun ekonómika no sosiál.

Maske Governu kompriende apelu sira ne'e, tanba difikuldade sira, ne'ebé rezulta husi restrisaun sira ne'ebé liga ba períodu estadu emerjénsia nian tuituir malu, ne'ebé sai grave liután iha fulan-abril tinan 2021, ho destruisaun ne'ebé provoca husi pasajen Siklone Seroja nian, Governu labele konkorda ho eskolha sira ne'ebé la konsidera konsekuénsia hirak ne'ebé sei mosu ba Povu nia saúde no moris, tanba defeza no protesausn ba ida-ne'e sai hanesan devér ida-ne'ebé Estadu labele husik hela.

Ita-nia parseiru dezenvolvimentu nian oin-oin no organizasaun internasionál sira, liuliu Organizasaun Mundiál Saúde (OMS) no UNICEF, mos la konkorda ho apelu sira atu hamamar medida sira kona-ba prevensaun no kontrolu pandemia ne'e nian iha ita-nia territóriu nasional, no sira defende nafatin manutensaun ba medida sira prevensaun, mitigasaun no kombate pandemia nian ne'ebé implementa iha fulan ikus ne'e.

Organizasaun internasionál sira defende mós manutensaun ba impozisaun serka sanitária sira no konfinamentu jerál ba populasaun, ne'ebé bainhira hahú adota karik, sempre hetan apoiu tékniku no halo tuir progresivu agravamentu situasaun epidemiolójika.

Ohin, la hanesan uluk, hanesan komunidadade nasional, ita tenke halo tuir no promove nafatin ábitu no komportamentu dí'ak sira ba prevensaun risku infesaun, hanesan: uza máskara, fase liman beibeik ho sabaun, distansiamentu sosiál, konfinamentu ka hela iha uma, evita halo dezlokasaun ne'ebé la importante no labele halibur malu hamutuk.

Kada semana, Governu, iha sorumutuk Konsellu Ministrus nian, ko'alia kona-ba nesiedade ne'ebé susar tebes atu tau iha ekilíbriu medida oin-oin ne'ebé uza iha kombate hasoru pandemia ne'e, no regula intensidade husi medida sira tuir situasaun konkreta ne'ebé verifika iha sirkunskrisaun administrativa ida-idak.

Iha tempu hanesan, Governu buka atu mantein ativu kanál sira distribuisaun ai-han no produktu esensial sira seluk, hodi permite, tuir saida maka bele halo, ezersísiu atividade ekonómika hirak ne'ebé esensial ba família sira-nia moris, sustentabilidade husi empreza no organizasaun sociedade sivil sira nian no atividade sira-ne'ebé mak konsidera importante ba esforsu rekonstrusaun país nian.

Nune'e, Governu kontinua determinadu atu salva moris, hodi fó ninia empenhu, dedikasaun no enerjia tomak atu kombate pandemia ne'e no kria kondisaun sira ne'ebé konsidera importante atu atende kazu infesaun foun sira ne'ebé, tuir projesaun no

tendénsia atuál sira, sei hatudu agravamentu situasaun nian ne'ebé preokupante iha semana hirak oin mai ne'e.

Senhor Presidente Parlamentu Nasionál,

Distintu Deputada no Deputadu sira,

Infelizmente ita hotu tenke prepara an ba senáriu ne'ebé aat-liu, no la bele lakon konfiansa no esperansa ne'ebé presiza atu ita bele hakat-liu no manán vírus mortál ida-ne'e iha tempu besik nia laran.

Governu hala'o ona dilijénsia hirak ne'ebé presiza atu prepara ita-nia país ba senáriu aat liu, ne'ebé iha possibilidade, iha tempu badak, sei bele hakat liu kazu foun infesaun loroloron nian hamutuk 1,000 (rihun ida) , hodi koloka Timor-Leste iha topu mundiál kona-ba kazu foun sira, hanesan ho Brazil, Papua Nova Guiné no Índia.

Karik senáriu ne'e mosu duni, ita tenke frontál no objetivu atu rekonhese katak ita-nia Servisu Saúde Nasionál nian sei la preparadu atu hatán iha tempu útil ba kazu hotu-hotu, liuliu kona-ba atendimentu ba situasaun emerjénsia nian ka iha akompanhamentu no tratamentu ba kazu COVID-19 sira ne'ebé grave liu, ne'ebé tenke baixa iha unidade kuidadu intensivu nian.

Ita-nia Servisu Saúde Nasionál, iha tempu badak, bele hasoru situasaun ida ne'ebé ho presaan boot tanba númeru kazu ne'ebé presiza assisténsia médiku-ospitalár sa'e maka'as, no situasaun ne'e bele agrava mós risku moris nian ba sira ne'ebé iha nanis ona kondisaun ne'ebé bele halo COVID-19 dezenvolve-an ho forma ida-ne'ebé aat liu.

Situasaun ida-ne'e sei sai dezafiu boot ba ita-nia Demokrasia no Instituisaun Estadu sira nian, nune'e mós ba ita-nia kapasidade prevensaun no reasaun iha Faze Resposta nian ne'ebé hahú ona.

Maibé, maske iha kalohan nakukun ne'ebé taka orizonte husi futuru besik, ita la bele lakon áhi esperansa, no fó ita-nia konfiansa ba ezekusaun ne'ebé lais husi Planu Nasionál Vasinasaun nian, ne'ebé la'o daudaun, ne'ebé hala'o daudaun hela iha ritmu ne'ebé dí'ak, no ne'ebé permite ona prosesu imunizasaun ba ita-nia maluk sidadaun na'in 65,000 (rihun neenulo-resin-lima).

Vasina sira profilaxia COVID-19 nian ne'ebé disponibiliza no fornese husi Sistema COVAX Nasoins Unidas nian no mós husi nasaun amigu sira Timor-Leste nian, hatudu jenerozidade no solidariedade internasionál ne'ebé Governu agradese, liuliu tamba sai

nafatin hanesan dalan mesak de'it ne'ebé efikás no sustentavel hodi hakat liu no manán moras mortál ida-ne'e.

Tamba ne'e, ha'u konvida lideransa nasionál, partidu polítiku sira, empreza no forsa viva sira ne'ebé halo parte iha ita-nia Sociedade Sivil atu kontribui ba esforsu diseminasaun no sosializasaun informasaun kona-ba benefísiu sira husi vasina, ne'ebé boot liu fali potencial risku hirak ne'ebé iha bainhira ita simu vasina.

Nune'e, vasinasaun jerál ba ita-nia populasaun sai hanesan estratéjia ne'ebé dí'ak liu atu asegura protesaun ba ita-nia povu nia saúde no vida, no mós dalan ne'ebé lalais liu atu ita filafali ba normalidade, rekupera fali ita-nia ekonomia, no harii fali ita-nia país, ho ánimu foun, determinasaun no empenhu.

Tanba ne'e, ha'u apela ba kompriensaun husi Exelénsia sira, Senhora no Senhor Deputadu sira, katak importante atu ita hamutuk no serbisu iha ekipa atu nune'e ita bele mobiliza ita-nia povu hodi halakon COVID-19 iha ita-nia país, hodi autoriza, ba efeitu ne'e, renovasaun ba da-14 (dasanulu-resin-haat) Períodu Estadu Emerjénsia nian.

Obrigadu barak.

Na'i Maromak haraik bénsaun mai ita-hotu!